

Абай облысында ортақ су пайдалану қағидаларын бекіту туралы

Абай облысы мәслихатының 2025 жылғы 30 қыркүйектегі № 30/200-VIII шешімі

Қазақстан Республикасы Су кодексінің 26-бабының 2-тармағының 2) тармақшасына, "Қазақстан Республикасындағы жергілікті мемлекеттік басқару және өзін-өзі басқару туралы" Қазақстан Республикасының Заңының 6-бабының 2-2-тармағына, "Құқықтық актілер туралы" Қазақстан Республикасының Заңының 27-бабының 2-тармағына, "Ортақ су пайдаланудың үлгілік қағидаларын бекіту туралы" Қазақстан Республикасы су ресурстары және ирригация министрінің міндетін атқарушының 2025 жылғы 11 шілдедегі № 171 (Нормативтік құқықтық актілерді мемлекеттік тіркеу тізілімінде № 36443 болып тіркелген) бұйрығына сәйкес, Абай облысы мәслихаты ШЕШТІ:

1. Қоса беріліп отырған Абай облысында ортақ су пайдалану қағидалары бекітілсін.
2. "Абай облысында ортақ су пайдалану ережелерін белгілеу туралы" Абай облысы мәслихатының 2025 жылғы 25 маусымдағы № 28/188-VIII шешімінің күші жойылсын.
3. Осы шешім оның алғашқы ресми жарияланған күнінен кейін күнтізбелік он күн өткен соң қолданысқа енгізіледі.

Абай облысы мәслихатының төрағасы

Ш. Байбеков

"КЕЛІСІЛДІ"

"Қазақстан Республикасы
Су ресурстары және ирригация
министрлігі Су ресурстарын реттеу,
қорғау және пайдалану комитетінің
Су ресурстарын реттеу қорғау және
пайдалану жөніндегі Балқаш-Алакөл
бассейндік инспекциясы" РММ-нің басшысы

_____ С. Мейрамбеков

2025 жылғы "_____" _____

"Қазақстан Республикасы
Су ресурстары және ирригация
министрлігі Су ресурстарын реттеу,
қорғау және пайдалану комитетінің
Су ресурстарын реттеу қорғау және
пайдалану жөніндегі Ертіс бассейндік
инспекциясы" РММ-нің басшысы

_____ М. Жәдігерұлы

2025 жылғы "_____" _____

Қазақстан Республикасы
Экология және табиғи ресурстар
министрлігінің Абай облысы бойынша
экология департаментінің басшысы

_____ С. Сарбасов
2025 жылғы " ____ " _____

Қазақстан Республикасы
Денсаулық сақтау министрлігінің
санитариялық-эпидемиологиялық бақылау
комитетінің Абай облысы бойынша
санитариялық-эпидемиологиялық бақылау
департаменті басшысы

_____ Н. Ноғайбаев
2025 жылғы " ____ " _____

Абай облысы мәслихатының
2025 жылғы 30 қыркүйектегі
№ 30/200-VIII шешімімен
бекітілді

Абай облысында ортақ су пайдалану қағидалары

1-тарау. Жалпы ережелер

1. Абай облысында ортақ су пайдаланудың қағидалары (бұдан әрі – Қағидалар) Қазақстан Республикасы Су кодексінің 26-бабының 1-тармағының 2) тармақшасына, "Қазақстан Республикасындағы жергілікті мемлекеттік басқару және өзін-өзі басқару туралы" Қазақстан Республикасының Заңының 6-бабының 2-2-тармағына, "Ортақ су пайдаланудың үлгілік қағидаларын бекіту туралы" Қазақстан Республикасы су ресурстары және ирригация министрінің міндетін атқарушының 2025 жылғы 14 шілдедегі № 171 (Нормативтік құқықтық актілерді мемлекеттік тіркеу тізілімінде № 36443 болып тіркелген) бұйрығына сәйкес әзірленді және тұлғалардың Абай облысында ортақ пайдаланылатын су объектілерінде ортақ су пайдалануды жүзеге асыру тәртібін айқындайды.

2. Ортақ су пайдалануды жеке тұлғалар рекреацияға, туризмге, әуесқойлық (спорттық) балық аулауға және шаруашылық немесе кәсіпкерлік қызметті жүзеге асыруға байланысты емес бос уақыттың өзге де нысандарына, сондай-ақ жайылымдарда ауыл шаруашылығы жануарларын суаруға деген жеке қажеттіліктерін қанағаттандыру үшін жүзеге асырады.

3. Ортақ су пайдалануды жүзеге асыру үшін арнайы рұқсат талап етілмейді.

4. Ортақ су пайдалану кезінде су объектілерін пайдалану су объектісінің ажырамас бөлігі болып табылатын жария су сервитуты шеңберінде жүзеге асырылады.

2-тарау. Ортақ су пайдалану тәртібі

5. Абай облысының қалалар мен аудандар әкімдіктері жеке тұлғалардың ортақ су пайдалану құқығын жүзеге асыру мақсатында:

- 1) су объектілеріне кедергісіз қолжетімділікті қамтамасыз етеді;
- 2) ортақ су пайдалану су объектілерінде жаппай демалуға, туризмге және спортқа арналған орындарды айқындайды;
- 3) әуесқойлық (спорттық) балық аулауды жүзеге асыру үшін балық шаруашылығы су объектілерінің және (немесе) учаскелерінің және іргелес жағалау белдеуінің учаскелерін айқындайды;
- 4) халыққа ортақ су пайдалану бойынша орнатылған шектеулер мен тыйымдар туралы хабарлауды қамтамасыз етеді.

6. Су объектісіне тікелей қолжетімділік болмаған жағдайда жергілікті атқарушы органдар Қазақстан Республикасы Жер кодексінің 69-бабына сәйкес қоғамдық сервитут орнатады.

7. Шектеулер немесе тыйымдар туралы ақпарат бұқаралық ақпарат құралдарында, мемлекеттік органдардың интернет-ресурстарында жариялануға жатады және су объектілерінің жағалауында арнайы ақпараттық белгілер орнату арқылы танысуға қолжетімді болуға тиіс.

8. Ауыл шаруашылығы жануарларын суару үшін су объектілерін пайдалану санитарлық қорғау аймағынан тыс жерде және суару алаңдары мен су объектілерін ластау мен кірлетудің алдын алатын басқа да құралдар болған жағдайда ғана рұқсат етіледі.

9. Балық шаруашылығы су объектілерінде әуесқойлық (спорттық) балық аулау жеке және (немесе) заңды тұлғаларға, аталмыш су объектісінде көл-тауар шаруашылығын жүргізу құқығы берілген тұлғаларға ұйымдастырылады.

10. Ортақ су пайдалану объектілерін пайдалану кезінде мыналарға жол берілмейді:

- 1) су объектілеріне жеке тұлғалардың қолжетімділігін шектейтін қоршауларды, шлагбаумдарды, тыйым салатын белгілерді және басқа да құралдарды өздігінен орнату;
- 2) су объектілерін ластау және кірлету;
- 3) шомылуға арналған жерлерде көлікті жуу, киім жуу және жануарларды шомылдыру;
- 4) арнайы ақпараттық белгілер орнатылған, ескерту немесе тыйым салу жазулары бар жерлерде шомылу;
- 5) арнайы ақпараттық белгілерді өздігінен алып тастау, зақымдау немесе жою;
- 6) жанармай және майлау материалдарын сақтау;
- 7) көлікті жанармаймен қамтамасыз ету, жуу және жөндеу жұмыстарын жүргізу;
- 8) су объектілерінде және олардың жанында кәмелетке толмаған балаларды ересектерсіз қалдыру.

© 2012. Қазақстан Республикасы Әділет министрлігінің «Қазақстан Республикасының Заңнама және құқықтық ақпарат институты» ШЖҚ РМК